

verderben gebracht, nit vor der possession hange. Damit
ist er abgeschaiden, und ist gleichwol libere geret und die
warhait gesagt, aber preter decorum und über alle hoff-
oder gepürlichkait. Wie aber diser tirann von Beren gelept,
5 also hat er auch, gleichwol nit tragice, sonder comice, ein
end genommen. Ein einzige dochter hat er verlassen, ist
sein erb gewest, und er ist wunderbarlich gestorben, wie
desshalben geschriften im druck sein ufsgangen, wiewol vil
leut vermaint, es sy im ain welsch monestelle zu essen
10 geben worden. Der allmechtig waisst am besten.

Aber das ich widerum vom zimbrischen bawen sag, so
hat man anfangs vil darvon getriben und ein ieder sein
pfenwert darzu geret. Manicher hat vermaint, der baw sei
zu grofs und costlich angefengt und werd nit mögen hinaufs
15 gepracht werden, und es werden auch noch drei von Zim-
bern hernach kommen, die alle damit werden zu schaffen
und noch daran zu bawen haben, als man einest auch sagt
von dem landcomenthur von Alschausen, war einer von
Ehingen, das der ain baw zu Alschhausen angefangen, do-
20 mit drei landcomenthur nach einandern würden zu thon
haben, den zu vollenden und aller dings aufzumachen.
Sollichs soll von dem landcomenthur, herr Wernher von
Reischach, erstlichs ufsgepracht und gesagt sein worden.
In allem bawen war der graff gewon, seinen werkleuten uf
25 herr Wilhalm, truchsesen, den jüngern, zu trewen, mit ver-
meldung, er würde bald kumen und alsdann ire unschick
und wölf im gebew glich sehen, welches auch manichmal
geschach, das er, so bald er ankame, die mängl des bawens
und wo man gefelet, het geferet und vermeldet. Das be-
30 schaint sich nit allain mit dem baw zu Messkürch, sonder
auch mit den zollrischen gebewen zu Sigmaringen. Da
pflag er den newen sal daselbs den sigmaringischen ross-
nagl von wegen der form zu nennen. Gleichwol er mit
solcher libertet und freien reden an etlichen orten ein
35 schlechten dank verdient. Es hat auch der ein das, der
ander ein anders an dem baw zu Messkürch mangl gehapt,
wie dann unmöglich was zu handeln oder zu machen, das
iederman gefall, bevorab aber im bawen, als her Sigmund
von Hornstain, landtcomenthur zu Alschhausen, mermals
40 gesagt, herr Wilhalm truchses von Walburg der jünger baw

*

21 vollenden] hs. vollend. 33 nennen] hs. nemen.